

者環六十四卦也閉目靜思者伯陽真人曰耳目口三寶閉塞勿發通真人潛深淵浮游守規中也身坐青黃白三色雲炁之中者我師緣督子曰先天一炁自虛無中來青炁是汞白炁是鉛黃炁是土以其汞鉛未合藉土合之紫陽自序云追二炁於黃道會三性於元宮攢簇五行合和四象龍吟虎嘯夫唱婦隨方知內外翁冥四獸羅列日月照明洞煥室內項生圓象如此分明密呪者大音希聲之謂此之謂行道此之謂誦經此之謂內外二景煉丹既就然後開告而身中魂魄皆化為神矣頌曰入室之功却妄情誦經行道早修行傳言玉女先關啓三十二天次第昇元始无量度人上品妙經註解卷上

元始无量度人上品妙經註解卷中 性二

上陽子陳觀吾註

上陽子曰經者道也敬也道則遵之而行敬則守之勿失世知所敬者三寶也夫三寶實妙道之宗以通用釋則曰身中三寶以世法釋則曰教中三寶其身中三寶有二事也曰教中三寶有二說也今言教中三寶曰道經師三寶有今科古科三寶此二說也道乃元始玄一之祖炁以生天地人物是為道寶經乃玉晨道君演元始玄一之道為萬世梯筏是為經寶師則老君降授張天師經錄以傳世流教是為師寶教之源流實遵天師而亦有二說也故教中以前三寶為今科以後三寶為古科而其號稱亦異此世法化俗之說若言道用則是身中三寶有二事也元始玄一至真之精曰天寶亦曰道寶上清金液先天之炁曰靈寶亦曰經寶混元无極至真之神曰神寶亦曰法寶此身中之三寶非此三寶不能還丹不能成佛不能成仙而三寶

大有金書言天寶靈寶神寶皆分炁而化亦身中之三寶若論還丹金液之道則身中三寶又有二說神炁精為內三寶耳目口為外三寶能專其外三寶而不妄動則內三寶方結還丹而成胎嬰也故夫真文寶符龍章鳳篆玉笈金書三洞典與三十六部萬八千篇皆出於三寶中曰經所以經即丹也即先天之一炁也此度人經乃玉晨道君演元始之道以授玄一真人玄一授天真皇人天真皇人依道君所傳書而成文以為經故每章以道言置首唯本章與玉曆二章不題道言乃皇人直以元始之道而書之然皆道君之所授今人以有道言者為序无道言者為經非也有誦二章而不誦前經者尤非也前標太上洞玄靈寶无量度人上品妙經者皇人所標也此則直標元始无量度人上品妙經者道君所標也然經之源流所傳亦別而諸經皆出於道君故道君為經寶經體道而行道因經而用若論金液還丹則經先丹

而行丹後經而用借經表丹則曰先天无
上靈寶九還金丹假道說經則曰元始无
量度人上品妙經頌曰元始先天神炁精
玄功无量最神靈度人度我須人度上品
丹方是妙經

元始洞玄靈寶本章上品妙首十迴度人百
魔隱韻離合自然混洞赤文无无上真元始
祖劫化生諸天開明三景是為天根上无復
祖唯道為身五文開廓善植神靈无文不光
无文不明无文不立无文不成无文不度无
文不生是為大梵天中之天鬱羅蕭臺玉山
上京上極无上大羅玉清渺渺劫仍若亡若
存三華離便大有妙庭金闕玉房森羅淨靈
大行梵炁周迴十方中有度人不死之神中
有南極長生之君中有度世司馬大神中有
好生韓君丈人中有南上司命司錄延壽益
算度厄尊神迴骸起死无量度人今日校錄
諸天臨軒
上陽子曰此章渾是道用元始太極未分
先天之祖炁洞玄三洞玄奧萬法之真宗

靈寶本章性也有也體也命之應也玄之
根也老子曰有物混成先天地生是以能
生物生人也上品妙首命也无也用也性
之應也此之門也紫陽真人曰白虎首經
至寶華池神水真經以其能生佛生仙也

迴者復也還也在經則曰十迴度人在丹
則曰九還金丹此經所以為三洞之冠者
在一度字也求仙作佛必先明度字方能
復此元陽真炁以結還丹百魔隱韻身中
六根八識三魂七魄三部八景二十四神
未知行道之人皆為其汨亂心君引歸慾
界故曰百魔今既修煉太丹則百魔受制
更無惱試離合自然蓋還丹之道雖曰有
為而非強為一離一合皆出造化之自然
悟真篇曰二物會時情性合五行全處虎
龍蟠者此也混洞赤文即本來之真性不
壞之元神青元真人曰元為萬物之根立
乎大象之首運化而无窮始為恍惚之初
在乎萬化之先獨尊而變還洞玄洞觀玄
一化度天人靈寶在天曰靈在世曰寶本

章具載修真合道之本上品獨得其玄方
便設教妙首衆妙之首萬法之宗天地虛
妙而清陰陽同妙而純日月含妙而明五
行合妙而精萬物盡妙而真內義曰上品
妙首金液還丹无上妙道之冠十迴度人

十月之功度世為仙百魔隱韻丹之異名
離合自然喻金木間隔復能互并水火相
剋復成既濟自然而成造化混洞赤文萬
物之本源衆生之真性一炁之祖萬神所
宗西昇經曰虛无生自然自然成大道夫
道者无形无體即先天一炁而化生萬物
為天地造化之本修金丹者體循造化以
虛无自然先天真一之炁名曰空炁金胎
生金母而作丹基此炁父母未交之前與
混沌同體故曰混洞父母媾精之後此炁
歛然感附謂之陽精喻為銀鏡名曰元神
藏在坤宮故謂之性即本來面目未生之
前謂之陰金已生之後謂之陽鉛是為五
金之母參同契曰徑指天地之靈根特為
藥祖明示陰陽之聖母用作丹基天地混

沌之先此炁結而成玉字故曰赤文乃无
 上可上至真妙道故曰无无上真也元始
 祖劫化生諸天元炁始炁於祖劫初化分
 三炁而生三天曰清微天高餘天太赤天
 三天之炁化分九炁而生九天曰始青天
 青元天始丹天太丹天始素天太素天始
 玄天太玄天青微天九天炁炁化分而生
 九霄九天曰大霄暉明流光素景天青霄
 元真實曜天碧霄總生開靈傳道天絳霄
 太平應化道主天丹霄中極至妙變空天
 玉霄皓元威德耀晶天琅霄飛青元關傳
 濟天紫霄合景雙闕化身天神霄玉清妙
 景大有天九霄炁炁化分下生九天即生
 神九天一南方鬱單无量天二西北禪善
 无量壽天三東方梵監須延天四西南寂
 然兜術天五東南波羅尼密不驕樂天六
 北方洞元化應聲天七西方靈化梵輔天
 八東北高虛清明天九中央无想无結无
 愛天又生大羅上清玉真三十六天下生
 四種民天種民天之一百三十五萬八

千里生无色界四天无色界之下三十六
 萬里生色界一十八天色界之內有輕塵
 六天細塵六天麤塵六天色界之下三十
 萬里生欲界六天欲界之下五百二十億
 萬里化生五億諸天八圓世界四種民天
 之上布日月星辰主持萬物故曰開明三
 景人之生亦類是也父精母血包于母腹
 精血未凝如珠似露凝結之後生形五臟
 頭與四肢男子先生左腎次右命門女則
 反是本性繼種於兩腎之間妙化之炁自
 然生發次則上生兩瞳神水以至化生五
 臟六腑九竅百脉筋骨齒髮炁足形全脫
 胎而生故老君曰天地媾精陰陽布化一
 月為胞精血狀也二月為胎形兆胚也三
 月陽神為三魂動以生也四月陰靈為七
 魄靜鎮形也五月五行分五臟以安神也
 六月六律定六腑用寶靈也七月七精開
 七竅通光明也八月八景神具降真靈也
 九月宮室羅布以定精也十月炁足萬象
 成也故神布炁滿三萬六千關節根源本

始一時生神此為化生諸天開明三景是
 為天根本起經曰夫道得三乃成故三合
 成德道不滿三諸事不成以內言之則曰
 鉛汞砂直指其物則我真性并日用妙化
 陰陽二炁合而成三上无復祖唯道為身
 老君化胡經曰道者元炁虛无天地從之
 而生萬物資之而形皆祖炁之妙化在道
 則曰金丹故曰上无復祖唯道為身也五
 文開廓普植神靈在丹則一炁復而變造
 五行五行具而成金胎在經則玉字出而
 結為赤文五文具而植神靈五行者鉛汞
 砂銀土天一生水坎中藏鉛地二生火離
 中產砂天三生木震龍主汞地四生金兌
 虎體銀天五生土中宮結丹道非此不光
 文非此不明身非此不立丹非此不成炁
 非此不度藥非此不生是為大梵天中之
 天大梵者先天炁凝而五行大備天中之
 天者身中有身也鬱羅蕭臺屬際也玉山
 上京泥丸也上極无上泥丸之上大羅玉
 清太玄也太玄內秘一機名日月高奔神

化胎之要黃庭經曰高奔日月吾上道
乃見玉清虛无老渺渺劫初至高至尊若
亡若存即張真人云視之不可見其形及
至呼之又却磨三華離便頂顯屬南南本
三數頂為華蓋又曰圓蓋南屬離離為午
位三華為金華玉華九華內丹已結而頂
有三華大有妙庭即上丹田乃百關總會
之穴金闕玉房日宮為金闕左目也月宮
為五房右目也森羅星宿也言日月星宿
列布而一身九竅靈澄大行梵炁即先天
妙炁周迴十方言妙炁營衛金胎神室温
養大丹如上皆道用略註尚有至妙之妙
心傳方可內景既露外景須明今復釋以
世法庶幾賢愚各具眼目也混沌亦文自
混沌之炁結而成赤文文字既出而妙經
行妙經行則祖炁具在人身散分子物類
之內是曰无无上真之謂也元始祖劫化
生諸天元始以道祖而鎮大劫以祖炁而
化生諸天祖炁分三炁而隸大羅三清之
界故曰開明三景要知此炁遇大劫而不

壞故曰是為天根此炁即太極之始炁而
生天生地生五行生人物已故曰上无復
祖道之在人身亦猶炁之在天地間故曰
唯道為身赤文立而五文開廓經法行而
善植神靈世无經文則不能光明不能成
立不能自度自生是經為大梵極品之音
天中之天即三清大羅聖境大者覆蓋萬
天羅者包羅三界中有玉京山周迴八萬
里下與崑崙對立山有鬱羅蕭臺臺有七
寶城上極无上有玉清殿又有三華離便
之宮大有妙庭皆天尊宴息之所金闕玉
房瑤池翠水森森列布皆憑梵炁周迴運
轉故得久而長存此中有度人不死之神
即元始分化之號南極長生君即朱陵大
帝治太微垣司火煉之事度世君主陽九
百六之變司馬君主滅邪却試好生君即
青華之別名主詮校韓君主南昌品秩學
人司命司錄主功過予奪延壽益算主增
注年命度厄尊神主消平厄難迴骸起死
君主升度死魂飛尸登晨今天尊說法臨

集帝軒校園檢錄品度學人如人身與玉
京无異金闕玉房丹田泥丸冥然列布若
一身神炁充滿則長生不死之神居其中
亦如玉京之梵炁周迴而无壞頃曰玉京
山上鬱羅臺上品經詮演十迴普植神靈
行梵炁三華離便五文開
東方无極飛天神王長生大聖无量度人
南方无極飛天神王長生大聖无量度人
西方无極飛天神王長生大聖无量度人
北方无極飛天神王長生大聖无量度人
東北无極飛天神王長生大聖无量度人
東南无極飛天神王長生大聖无量度人
西南无極飛天神王長生大聖无量度人
西北无極飛天神王長生大聖无量度人
上方无極飛天神王長生大聖无量度人
下方无極飛天神王長生大聖无量度人
十方至真飛天神王長生度世无量大神並
乘飛雲丹輿綠輦羽蓋瓊輪駮駕朱鳳五色
玄龍建九色之節十絕靈幡前蕭九鳳齊唱
後吹八鸞同鳴師子白鶴嘯歌邕邕五老啓

達群仙翼轅億乘萬騎浮空而來傾光迴駕
監真度生

上陽子曰十方飛天大聖皆元始道炁分
形東方諱總南諱飛西諱雲北諱无鏡東
北諱梵東南諱那郁西南諱度仙西北諱

鑾炁上方諱瑛下方諱落一曰十方長生
大聖一曰十方救苦天尊奉元始命掌十
方三界校量功德開度无量總括生死陶
鑄學人藏經載八方諸天皆有无極大千

世界東方无極諸天安大堂鄉大千納善

世界南方无極諸天兜黎城境大千素賢
世界西方无極諸天福堂洲大千成行世
界北方无極諸天鬱單野大千清靜世界
東北无極諸天福集都大千長安世界東
南无極諸天元福田大千用賢世界西南

无極諸天延福鄉大千仁靜世界西北无
極諸天福德野大千延賢世界上方上清
玉真三十六天玄都无極世界下方黃曾
三十二天八圓无極世界无量大神主監
得道長生度世之事青元真人曰輿輦輪

蓋皆陽精之炁所成鳳鶴龍鸞乃陰精之
炁所化上聖之人具真常之道呼吸合散
隨意現前陰陽炁諧如歌似曲皆炁所為
並非外物人若還丹功成陰魔亦化陽神
元氣一呼萬神咸聽五臟神靈各隨方色

自現輿輦儀衛來迎百骸衆神前導後從
升舉朝元與此無異五老啓途東方青靈
始老姓關諱開字靈威仰南方丹靈真老
姓洞浮諱極炎字亦燦營中央元靈元老
姓通班諱元氏字含樞紐西方皓靈皇老

姓上金諱昌開字曜魄實北方五靈玄老

姓黑即諱靈會字隱侯局十方大聖道位
高尊乃感五老啓途而群仙翼轅億乘萬
騎浮空而來然皆法身之神丹經有曰神
御炁炁留形傾光回駕玉光飛雲迴旋天

尊之法座領監衆真較度群品以丹言則
傾光迴駕乃坎離既濟陰陽已交真神化
生溫養胎室故曰監真度生頌曰无極天
真集藥宮丹與綠輦御浮空傾光回駕群
仙慶陽長陰消妙化功

諸天丞相南昌上官韓司主錄監生大神執
籙把籍齊到帝前隨所應度嚴校諸天普告
三界无極神鄉泉曲之府北都羅鄴三官九
署十二河源上解祖考億劫種親疾除罪簿
落滅惡根不得拘留逼合鬼群元始符命時

刻昇遷北都寒池部衛形魂制魔保舉度品
南宮死魂受煉仙化成人身身受度劫劫長
存隨劫輪轉與天齊年永度三塗五苦八難
超凌三界逍遙上清上清之天天帝玉真无
色之境梵行

上陽子曰此道用世法兩事俱明世法諸

天丞相天天各有丞相一云即大羅神公
南昌即丹天世界上官即朱陵火府韓司
宮中丈人即司命也主煉度文籍之事主
錄乃天中宰協侍宸主錄勒籍之司監生

主生魂鑄魄也太上說經各持錄籍齊到
帝前校其應受度者或宿名玄圖骨相合
仙或修齋奉戒功德積感或敬奉三寶善
功徹天或供養師寶為三官所稱名在諸
天者各為嚴行考校據功量品隨其高下

應受升度也以道用則執錄把籍元始炁分而陰陽判三才既立而文籍生內義曰顯諸仁則為錄籍藏諸用則為陰陽幽明无錄籍功罪何所記天地无陰陽造化何由成故帝前即中宮神室帝之所御四海輻湊神之所舍萬炁混凝喻陰陽交會於中宮神室故曰執錄把籍齊到帝前天尊說經的非虛言欲人行其道耳修學之人且當改過遷善守戒防淫去詐息機清心寡慾嗟夫世人逐末忘本賤命輕身英雄豪傑者為功名所役聰明特達者為進取所羈衣食富足者為營計所籠貧窮困乏者為口體所累其有出塵之士只樂逸豫以為清淨无為是修行誤矣何能得陰陽交會於神室哉隨所應度金丹之道要實工夫隨功受報十分工夫有十分受用一或城裂其報亦滅裂雖所修至密所為莫知然渺渺大羅之天无不嚴校而紀錄者普告三界欲界色界无色界亦天地水三界也无極神鄉十方无極世界亦三界神

庭廟杜泉曲之府北有大海人身則號為泉曲其穢惡黑腥莫測邊際為江海之要府停錄罪魂北都羅酆太極之初清炁上為圓蓋半清半濁之炁中為人物重濁之炁炁凝為羅酆在北陰之癸地高萬餘里周迴數千里上參碧落下際風泉黑鬱之炁盤礴其中山有六洞宮一曰紂絕陰天宮二曰泰殺諒事宗天宮三曰明晨耐犯武城天宮四曰恬照罪炁天宮五曰宗靈七非天宮六曰敢司連死屢天宮每宮各有魔王主之人能持此六官名常生敬畏者則魔王保舉削落罪名三官九署三官為三元上元在山之阿去天為近天官領之主校功錄善升降品秩中元在山之左地官領之中有靈獄主治罪魂為追呼之府下元在山之右去風壘近水官主之下有九日大獄寒冰之庭主治重罪鬼囚九署九壘土皇九令之司又有天上三官天官隸玉清境置三官九府三十六曹官僚皆化炁為之總主上真玉虛高皇上帝諸天

帝聖及世男女士生命錄籍罪福學道仙籍中元地官隸上清境置三官九府四十二曹官僚皆世人有功高德重者為之總主五嶽諸真得道神仙九地土皇八極諸靈官下元水府隸太清境置三官九府四十二曹官僚皆世人積善建功者補充總主水帝河海九江水府及仙簿人民生死功過三元各有三官九府為九署也十二河源一切水際分治罪魂之所天尊說經使為學人上解祖考億劫種親消除三惡罪根更不拘留乘元始九龍符命而昇遷也北都寒池酆都洞陰之境有朔單鬱絕之都五炁天君主之九地之中北陰天君主之九水之中大溟水帝主之總號北都中有三界大魔五帝考官巨力士勾校罪魂之神夫人^{住二}生為陽魂死為陰魄若魂魄散亂莫可執持令其部衛形魂使不散壞乃得制魔保舉度品南宮度品者若積諸善根則受煉仙化若无功過受度人身若修行至經功滿則生身劫劫長存永度三

塗一天塗色慾門上尸道二人塗愛慾門中尸道三地塗貪慾門下尸道此為在世三塗如地獄鬼趣傍生為陰界三塗也五苦者色累苦心門愛累苦神門貪累苦形門華競苦精門身累苦魂門夫學仙者被此三塗五苦所逼故云八難若能度之便超三界也若論還丹則普告三界三丹田也無極神鄉一身萬神之所泉曲之府即慾海也北都羅鄴乃愛根也學人不去愛根則汨沒于慾海三官九署即身中三元

九宮十二河源人身有十二愛河之源上解祖考人為妄想所迷嗜慾所汨昏濁沉滯不得清明如人祖彌拘滯鬼群之化修煉者要萬炁朝生門百神守死尸疾除罪簿頓除慾想落滅惡根永絕妄緣則出類拔萃更不適合於鬼群元始符命即先天之真炁符竅也汞也陽中之陰龍之弦炁也命妙也鉛也陰中之陽虎之弦炁也經云常無欲以觀其妙常有欲以觀其竅故先哲云書符不知竅反被鬼神笑老子曰

竅者冥其中有精其精甚真其中有信此信即符信也此為元始符命其以元始真炁符合命門之祖炁何哉夫人之身稟元始祖炁而生至于盛壯踰趨於醉夢之場而此炁奔失若修行人先煉陽中之陰以留真汞次煉陰中之陽以求真鉛一時刻中凝結成丹則可覲升遷矣北都即性根蕃生真汞寒池即命門蕃生真鉛當此鉛汞交媾性命混融直須把握一念部衛形魂若形全魂復脉住炁停還丹始結故能制魔保舉度品南宮所謂枯槁形骸將死之魂受此鉛火煉度得神仙妙化之道以成真入矣生身受度天尊顯此一句證出還丹之旨蓋此經非只為死者言乃修行人生身受此真炁以度且生身則陰陽可全而造化可掬學人能以有生之身倒用五行修此大丹以成高仙則劫劫長存隨劫輪轉與天齊年永度八難之苦超欲界色界无色界凌四種民天而逍遙上清薛幽樓曰上清有三十六天天帝皆道齊元

始位列玉清故云玉真在无色之境之上出造化之外憑梵炁而行出入無間非如三十二天在乎三界之內也故曰梵行頌曰天帝玉真六六天丹成道備與齊年形神俱妙經功滿劫劫長存位上仙

他本有以此天帝名諱作元始靈書上篇者非也殊不知天公經云大羅天自有靈書上篇并觀覺鬱繼龍篆正文在靈書中篇前蜀本或置于下篇亦非也青元真人曰當從天公經是矣

東方八天
元始積九陽梵炁以成六天為欲界二天為色界天帝冕服皆青
太皇黃曾天
異號淨天或稱觀史色黃次奎壁人修十善功凡一根淨者生此天釋云四天王天帝鬱繼玉明
正音開玄攝明天帝內諱鬱繼帝魔隱意玉明四字祕天之紫極宮主長生籙
大明玉完天

或稱勝妙天色綠次壁人修二十善功二
根淨者生此天釋云切利天

帝須阿那田

正音保玄道靈天王內文須阿隱音那田
四字祕天之紫房宮主度魂更生

清明何童天

異號光天色黑次室人修四十善功三根
淨者生此天一作河童釋云夜摩天

帝元育齊京

正音明生九真天王隱諱元育真人內文
齊京四字祕天之九晨宮主布政教

玄胎平育天

異號梵天或稱切利色赤次危人修六十
善功四根淨者生此天釋云兜率陀天

帝劉度內鮮

正音飄翰默然天帝隱名劉度內鮮四字
祕天之元景宮主召魔舉仙

元明文舉天

或云化樂色蒼次虛人修八十善功五根
淨者生此天釋云樂變化天

帝醜法輪

正音開生舒天帝內文醜異號法輪三字
祕天之廣寒宮主通行元炁

上明七曜摩夷天

異號化樂謂慾樂之極色黑次女人修一
百善功六根淨者生此天釋云化化自在

天

帝恬愴延

正音延虛明天帝內音恬愴隱號延三字
祕天之大陰宮主開度幽難

虛无越衡天

或云初梵色碧次牛天人六根雖淨尚拘
色塵乃升此天釋云初禪梵衆天

帝正定光

正音鏡無翹天帝內文正定光三字祕天
之大玄宮主无上道

太極濛翳天

或云上梵色紫次斗天人一塵塵淨升此
天亦號初禪天釋云梵輔天

帝由育九昌

正音阿難淨明天王隱號由育總文九昌
四字祕天之玄都宮主煉度朽骸

南方八天

元始積三陽炁以成八天屬色界四天
為羅塵四天為細塵青冕赤旒朱服

赤明和陽天

或號少光色白次箕斗天人二塵塵淨升
此天亦號初禪天釋云大梵天

帝理禁上真

正音治安保仙天王隱號理禁上真四字
祕天之長明宮主煉仙成真

玄明恭華天

或云光音色黃次箕天人三塵塵淨生此
天亦號二禪天釋云少光天

帝空謠醜音

正音飛音炁靈天帝內文空謠醜音四字
祕天之東華宮應化一切

耀明宗飄天

或云无量光色綠次尾天人四塵塵淨生
此天亦號二禪天釋云无量光天

帝重光明

正音翹真英天帝總號重光明三字秘天之浩元宮主劫終學仙之人竺落皇茹天

異號初淨色青次心天人五麤塵淨生此

天亦號二禪天釋云光音天

帝摩夷妙辯

正音難玄明天帝隱諱摩夷內音妙辯四字秘天之清玄宮主魔試學人

虛明堂曜天

異號嚴淨色赤次房天人六麤塵淨尚有細塵生此天釋云少淨天

帝阿伽婁生

正音彌論玄明天帝隱音阿伽梵號婁生四字秘天之重華宮主度學人

觀明端靖天

異號遍淨色蒼次底天人一細塵淨生此天亦號三禪天釋云无量淨天

帝鬱密羅千

正音朗觀曜明天帝隱文鬱密內號羅千

四字秘天之光華宮主開度天人

玄明恭慶天

或號无量淨色黑次亢天人二細塵淨生此天亦號三禪天釋云遍淨天

帝龍羅菩提

正音威清道玄飛天內音龍羅帝君隱號

菩提四字秘天之開闔宮主得道人

太煥極瑤天

異號福愛勝色碧次角天人三細塵淨生此天亦號四禪天釋云福生天

帝兜黎无延

正音洞真永觀天王內文兜黎无延四字秘天之帝康宮主教學人

西方八天

元始積七陽梵炁以成二天為色界細塵

天六天為輕塵天青霓金梳白服

元載孔昇天

或云快樂色紫次軫角天人四細塵淨生此天亦號四禪天釋云福受天

帝開真定光

正音開光竟真帝君內音開隱諱真定光

四字秘天之延命宮主煉魂

太安皇崖天

異號極樂色白次軫天人五細塵淨生此天亦號四禪天釋云廣果天

帝婆婁阿貪

正音暉莫阿魂天君隱音婆婁帝魔內諱阿貪四字秘天之開明宮主度善人

顯定極風天

或云廣樂色黃次翼天人細塵雖淨尚餘輕染生此天亦號四禪天釋云无想

帝招真童

正音回翹威天君秘號招真童三字秘天之大赤宮主度有善功之魂

始皇孝芒天

或云上妙色綠次張天人一輕染淨升此天釋云无煩惱天

帝陸羅婁王

正音君華大權五真隱文陸羅婁王四字秘天之大丹宮主披夜開幽

太皇翁重淨容天

或云色究竟天色青次星以色塵漸除故云色究竟二輕染淨升此天釋云无熱天

帝閔巴狂

正音惠威光帝君內文閔巴狂三字秘天

之華蓋宮主召魔集真

无思江由天

或號最上妙色赤次柳天人三輕染淨升此天釋云善見天

帝明梵光

正音即明法元帝君內號明梵光三字秘天

天之明堂宮主開度善魂

上揲阮樂天

或號自在色蒼次鬼天人四輕染淨升此

天釋云善現天

帝勃勃監

正音鬱无真星天帝內文勃勃內號監三

字秘天之運靈宮品類天人

无極曇誓天

異號大自在亦云不還色黑次井天人五

輕染淨升此天釋云色究竟天

帝飄弩穹隆

正音飛天虛英天魔內文飄弩天君隱諱穹隆四字秘天之中无宮主度仙

北方八天

元始積五陽梵炁以成四天為无色界天

四天為種民天青冕白旒皂服

皓庭霄度天

異號不空色碧次參井天人輕染雖淨尚

餘結習升此天釋云无邊空處天

帝慧覺昏

正音無清明帝君內音慧覺昏三字秘天之瓊瑤宮主拔度學人

淵通元洞天

異號大不空色紫次參天人色塵都忘但

有心識升此天釋云无邊識處天

帝梵行觀生

正音洗權道无天君內音梵行隱諱觀生

四字秘天之真元宮主度學人

太文輪寵妙成天

異號非想色白次紫天人心識兩忘炁觀

漸妙升此天釋云无所有起天

帝那育醜瑛

正音靈熏慧光帝魔內文那育醜瑛四字秘天之靈幽宮主統理事

太素秀樂禁上天

異號非非想色黃次畢天人結習漸忘炁

觀轉妙升此天釋云非非想天

帝龍羅覺長

正音陽威曜清天帝內文龍羅覺長四字

秘天之九靈宮主領錄魔王

太虛无上常融天

異號不動色綠次昂天人結習頓忘漸入

神觀升此天釋云不動天

帝總監鬼神

正音攝靈真天帝攝魔內音總監鬼神四

字秘天之力福宮主校學人功過

太釋玉隆騰勝天

異號大不動天色青次胃天人結習頓忘

神觀轉妙升此天釋云大不動天

帝眇眇行元

正音空微道明帝君隱號眇眇行元四字

秘天之日蓋宮主召集仙聖

龍變梵度天

異號上妙天色赤次婁天人清淨无染證

不空果升此天釋云上妙天

帝運上玄玄

正音掬靈妙光天王内文運上玉真總音

玄玄四字秘天之靈寶宮進仙成聖

太極平育實奕天

異號最上妙色蒼次奎天人洞入道妙證

无上玄覺升此天釋云最上妙天

帝大擇法門

正音永玄久生天王總文大擇法門四字

秘天之天寶宮普度學人

三十二天三十二帝諸天隱諱諸天隱名天

中空洞自然靈章諸天隱韻天中之音天中

之尊天中之神天中大魔天中之靈九和十

合變化上清无量之與深不可詳數落神真

普度天人

上陽子曰天帝内文隱名色服根塵皆天

尊矜憫下愚命天真皇人註釋下教於未

聞者見洞神經内音經龍躡經本際經天

公經等黃曾至七曜六天為欲界即下界

也初出凡欲未除天中之人觸物染著初

上二天身交為欲其次二天接手為欲又

次五天以口為欲又次六天眼視為欲以

色欲故交接陰陽故云欲界因其欲樂衰

相易見壽命終盡復淪諸趣若漸修習欲

樂頓除升入色界名小乘道如大劫交火

從崐崙根起焚燒世界燄冲和陽天元炁

潰散天乃淪壞越行至曇誓天為色界即

中界也此天之人有六色十八塵一塵淨

升一天十八塵淨升无色界天若稍貪著

復墮欲界名中乘道如大劫交水自東井

起洪泉鼓波漂至極風天元炁潰散天乃

淪壞皓庭至秀樂四天為无色界即上界

也塵染俱淨乃升此天太真科曰无色界

中至真无情不交陰陽人若化生但嗽真

炁无復形質修至一天唯存心識若心識

除次第而升炁觀道成洞入自然升種民

天釋云菩提薩埵天大乘道也如大劫交

水火不到唯風浩蕩孝芒至霄度六天為

風所壞元洞至秀樂元炁散而復合更无

劫數常融至平有四種民天洞入真道乃

升此天為最上乘如大劫交三界壞盡此

天復生聖人以為民種故號種民若丹成

道備經功滿就則升上清天也夫天帝魔

神靈章之秘皆空洞之炁結成一切神靈

憑之變化猶還丹實元始祖炁九和十合

之功以成金胎胎嬰變化而身入上清矣

无量之與此丹最為神化之與深隱而不

可詳述數落神真散也落布也乃散真

文布置諸天令其執持普度天人皆成妙

道此道用世法之通釋也頌曰三十二天

總是塵色心都寂現全身九和十合經功

滿金闕宮中侍玉宸

今日欣慶受度歷關諸天請滅三惡斬絕地

根飛度五戶名列太玄魔王保舉无拘天門

東斗主算西斗記名北斗落死南斗上生中

斗大魁總監眾靈青帝護魂白帝侍魄赤帝
養炁黑帝通血黃帝中主萬神无越青天魔
王巴元醜伯赤天魔王負天擔石白天魔王
反山六目黑天魔王監醜朗馥黃天魔王橫
天擔力五帝大魔萬神之宗飛行鼓從總領
鬼兵麾幢鼓節遊觀太空自號赫奕諸天齊
功上天度人嚴攝北鄴神公受命普掃不祥
八威吐毒猛馬四張天丁前驅大帥仗幡擲
火萬里流鈴八衝敢有干試拒遏上真金鉞
前戮巨天後刑屠割鬼爽風火无停千千截
首萬萬剪形魔无干犯鬼无妖精三官北鄴
明檢鬼營不得容隱金馬驛程普告无窮萬
神咸聽三界五帝列言上清

剛真性未煉元始之炁炁飛度五戶以還
元而名列于太玄天門者命門也當入室
時魔王監真舉事使无拘滯天門青陽初
回東斗主算金華吐統西斗記名取坎中
陽北斗落死補離中缺南斗上生炁歸黃
庭中斗總監眾靈也青帝姓常諱精明護
魂治肝白帝姓混諱蓐收侍魄治肺赤帝
姓炎諱洞丹養炁治心黑帝姓玄諱明萌
通血治腎黃帝姓麻諱忠慎中主黃堂制
御萬神大洞玉帝錄云五帝與天地同存
陰陽始判化生五行大修行入五帝降神
而煉金液降炁以結胎嬰青天魔王姓斌
諱齒成赤天魔王姓佛名由肅白天魔王
姓赤名張市黑天魔王姓徐名直事黃天
魔王姓天門名波狂皆主貪欲耗搖神炁
故呼魔王五帝大魔即天王也即人身五
官也發施生育之功主持金丹妙道承天
尊勅攝之命各現帝相故稱五帝若居欲
界以色聲香味觸魔試學人故云大魔萬
神之宗為一身之主宰天尊昔降此五魔

有禦魔總真靈文令五帝符吏分衛五方
青帝符吏名啓華赤帝符吏名明真白帝
符吏名茂成黑帝符吏名守元黃帝符吏
名升冥各安其方守衛靈文以禦魔試道
用則四帝大魔屬彼涵元始炁炁亦稱諸
天亦號金公亦曰太乙亦名白虎唯東方
青帝大魔屬此捏生殺之柄亦稱本命元
神亦號无位真人亦名金剛神王飛行鼓
從彼四帝大魔飛行三界鼓集部從總領
欲界鬼兵以示姪慾之道魔試學人魔懂
鼓節此青帝大魔魔起播幢鼓動旌節雖
居色界不為慾亂稟受元始炁炁真命察
惡勸善故曰遊觀太空自號威雄赫奕之
獨尊與彼四帝諸天齊其生育之功上天
度人四帝諸天其中最善者曰上天其施
度人妙化必先嚴行攝起北都羅鄴檢舉
愛根以煉還丹庶令神公受命神公即我
元神號馬龍氏諱廓奕其稟受元始炁炁
真命一切掃去貪淫不祥之鬼八威吐毒
八威乃眼耳鼻舌身意六識并合藏傳送

為八識號曰八威吐去色聲香味觸法之
 毒害不令惱亂然後金剛神王駕猛馬以
 四張遣天丁前驅勇猛而進飭大帥仗旛
 堅固而行擲火萬里則光燦燦流鈴八衝
 則圓陀陀彼四帝諸天若稍有干試拒上
 天度人之道還元始一炁之真使不能還
 元則金剛神王以金錢而前戮巨天力士
 仗巨戈而後刑屠割五濁之淫鬼急如風
 火以无停蓋半時之功要疾速之意千千
 截首千妖屏迹萬萬剪形萬怪逃形彼无
 干試違犯三官三元也北鄴真性也則三
 元專制真性洞明檢按鬼妖營窟不得容
 隱元始梵炁金馬黃道也驛程急速也使
 此炁馳逐黃道而歸神室普告无窮一炁
 所臨萬神聽令三界即三四五帝即五官
 皆列言奏功于上清也以世法則如經所
 言不釋亦明頌曰赫奕威雄正令行魔無
 干犯鬼無精一些粗炁還丹就三界列言
 奏上清
 元洞玉曆龍漢延康眇眇億劫混沌之中上

无復色下无復淵風潭洞虛金剛乘天天上
 天下无幽无冥无形无影无極无窮溟滓大
 梵寥廓无光赤明開圖運度自然元始安鎮
 敷落五篇赤書玉字八威龍文保制劫運使
 天長存梵炁彌羅萬範開張元綱流演三十
 二天輪轉无色周回十方旋斗歷箕回度五
 常三十五分總炁上元八景冥合炁入玄玄
 上陽子曰二章為經之脉為丹之髓何也
 本章是煉金液還丹事故示赤文為采藥
 之具十方浮空而來齊到帝前乃聚精會
 神至今日欣慶受度方乃合丹既得一炁
 還元則身中五斗五帝効職驅邪逐去陰
 魔鬼炁故示萬萬剪形之功老子曰下德
 為之而有以為者本章之謂也此章是煉
 玉液大丹事故示玉曆為紀元之始所以
 无幽无冥无形无影者蓋炁初回而未帖
 得元始梵炁安鎮則萬範開張以至萬炁
 齊仙也九品經曰昔混元溟滓諸天未分
 元始肇形五劫初化乃命梵元祖晨道君
 肇錄天元運乘五劫故元洞者以成祖炁

玉曆者以紀天元自一炁化分三因成九
 若龍若蟻蟠曲九道漠漠无極總九陽相
 炁之元太上迺運梵合炁開始青天元祖
 炁故東方得九炁以分天境劫號龍漢南
 方得三炁以分天境劫號赤明中央得十
 二炁以分天境劫號上皇西方得七炁以
 分天境劫號延康北方得五炁以分天境
 劫號開皇五劫既周昊天成象一炁混道
 八景流光八帝示形九霄分化結元洞五
 陽之炁為玉曆乃命天真皇人以玉曆紀
 元洞之初劫運流復之本天真天民學仙
 功續升退之道青元真人曰天地生成始
 於龍漢終於延康幾成幾壞莫可億度故
 云眇眇每劫運壞天地蕩散山海消融物
 象一空无復形質唯元洞之炁混然不分
 泯然始構是云混沌當此之時暗包真一
 之水而五行未胚上无色象下无淵極上
 風下澤空洞虛无金剛之炁乘載天根幽
 冥言隱顯形影言物象窮極言分際溟滓
 言曠蕩當其混沌之中天上天下隱顯曠

蕩莫分物象分際未別唯大梵之炁塞廓
未有光影及後金風炁摩而生火四象化
合而生土博載天地長養萬物此謂三境
高真過度災劫乃比衆生沉滯生死輪轉
无窮喻金丹返本如經劫運之難今幸梵
炁還元尚无形象赤明開圖赤明元年玉
曆定紀天地日月山川物象分判生長亦
猶還丹之有位也四序推遷各得其所故
曰運度自然亦猶還丹之元爲也元始安
鎮敷落五篇元始觀梵炁結形刻玉成雲
篆天章載妙元神真道五者故云五篇悟
其妙者入其妙悟其元者入其元悟其神
者入其神悟其真者入其真悟其道者入
其道故盡妙合元盡元合神盡神合真盡
真合道字經火煉故云赤書八威龍文文
列蒼龍巨虬金師麒麟白虎玄豹丹蛇巨
獅之狀是云八威其文保制劫運使天長
有也梵炁彌羅元炁所化曰梵炁先天地
立爲大道根元始質之而御運天地賴之
以生成彌覆三界羅絡諸天兩儀既張物

象成布故云萬範開張梵炁爲元化之綱
流演於三十二天如輪運轉從无色界周
回十方自斗至箕回度五常以日月五星
合二十八宿故云三十五分總受高上天
元之炁八景冥然交合以成玄功故云炁
入玄玄皆喻還丹將結胎嬰也頌曰无形
无影却尋踪一炁周回顯聖功最是金丹
靈妙處開張萬範廣神通
玄中太皇上帝高真況景太霞嘯詠洞章金
真朗郁流響雲營玉音攝炁靈風聚煙紫虛
鬱秀輔翼萬仙千和萬合自然成真真中有
神長生大君无英公子白元尊神太乙司令
桃康合延執符把籙保命生根上游上清出
入華房八冥之內細微之中下鎮人身泥丸
絳宮中理五炁混合百神十轉回靈萬炁齊
仙仙道貴生无量度人上開八門飛天法輪
罪福禁戒宿命因緣普受開度死魂生身身
得受生上聞諸天諸天之上各有生門
上陽子曰此明金丹道用玄中天心也即
人身正中之心太皇元始也即祖炁曰道

寶上帝道君也即金母曰經寶高真老君
也即丹體曰法寶是爲一體三寶釋云清
淨法身是性圓滿報身是智千百億化身
是行性與命合陰慘陽舒况景太霞嘯詠
洞章梵炁始生况然涵泳于元和之中金
公乍還快暢嘯詠於洞章之句金真朗郁
金炁周行流響雲營炁營鄴玉音攝炁
玉液煎鉛靈風聚煙鉛爲汞制紫虛鬱秀
汞結紫花輔翼萬仙功行外備千和萬合
煉成一塊自然成真胎嬰已成真中有神
胎已凝神長生主心无英主肝白元主肺
太乙主頭司令主神桃康主脾合延主腎
執符把籙煉炁合神上游上清梵炁上行
出入華房自頂至踵頭有三華之庭體有
曲密之房八冥之內皆炁通行細微之中
无所不至下鎮人身升泥丸下絳宮中理
五炁住黃庭合百神十轉而百靈回我十
月而萬炁齊仙身外有身真人出現仙道
貴乎長生太上无量度人八門有長生之
門法輪乃運轉之道凡世有罪福宿命仙

家唯禁戒功緣形神普受開度死魂悉得
 生身此身得受長生姓名上聞諸天諸天
 校錄功行隨品定其生門功高則金闕侍
 宸行滿則上仙品級上陽子南嶽侍趙老
 師聞人誦度人經問曰何云金剛乘天師
 曰要莫糊塗你且從頭說來我先問你混
 洞赤文是何物就起揖問師曰我聞這四
 字便一身冷汗言下即悟把此經一串透
 過師却曰你知金剛乘天了也曰通身是
 汗師曰參須實參悟須實悟更向上說句
 來曰如今超无色界了師鳴指一下曰如
 是如是這般話頭道是機鋒不怕罪福禁
 戒忒恁泄露經旨所恃將來過平育天魔
 王却肯保舉也此經尊妙不可稱量故為
 三洞上品道藏之首然體元始之意大槩
 唯欲存道說經以明道使人知敬此道出
 經以泄道欲人知行此道是道為經之體
 經為道之用因經顯道因道尋經世之凡
 夫聞經則敬聞道則笑遇經則琅琅而念
 誦聞道則成群而毀謗只如道為母經為

子世未有愛其子而罵其母也道之所以
 開天地揭日月施風雨役雷霆令人聞雷
 震則掩耳聞道則非笑太上雖慈悲而不
 加譴然人之自取沉墜者為當何如何謂
 道何謂經全陰陽造化者謂之道全性命
 體用者謂之經有陰而無陽不可以為道
 有體而無用不可以為經是道為陰陽之
 根經乃性命之用以其性合元命是配陰
 陽以外形合內神是全體用夫唯元始還
 丹之道與人受胎本同人受凡父母精血
 之初亦溟滓混沌而无形精血既安一月
 為胞二月成胎三月生魂四月定魄五月
 分五臟六月開六腑七月明七竅八月具
 八景九月相足十月氣全脫胎而生還丹
 之道正類是也其受靈父聖母妙氣之初
 必九和十合而金炁始來亦溟滓混沌洞
 虛寥廓无色无淵之可倚无形无影之可
 依元炁安鎮五行敦落彌羅周回冥然凝
 合汎嘯朗營復元歸空攝聚鬱輔合孕懷
 真生五臟理五炁合百神結胎嬰號曰陽

神出入神化但人受凡父母精血而生其
 質不靈金丹是靈父聖母之炁而毓能變
 化飛行是謂性命變修形神俱妙頌曰混
 合百神賴此經此經尊妙甚分明天中梵
 炁胎嬰就萬炁齊仙步玉京
 中有空洞謠歌之章魔王靈篇辭參高真
 第一欲界飛空之音
 人道眇眇仙道莽莽鬼道樂兮當人生門天
 道貴生鬼道貴終仙道常自吉鬼道常自凶
 高上清靈爽悲歌朗太空惟願仙道成不欲
 人道窮北都泉曲府中有萬鬼群但欲逼人
 算斷絕人命門阿人歌洞章以攝北羅鄴東
 送妖魔精斬馘六鬼鋒諸天炁蕩蕩我道日
 興隆
 上陽子曰靈寶經法云洞章乃龜山丹黃
 飛玄紫文非魔王所為尹真人侍老君西
 遊龜臺入七寶園觀其文修之有法布此
 三章于世令人開悟超出三界昔天尊降
 魔魔王悉皆稽首受事乃勅魔王都默統
 治欲界勅魔王摩羅統治色界勅魔王无

明治无色界各歌謠章變化飛空垂我天人屏絕欲鬼令人聞此飛空之音轉色欲苦歸清淨門自黃會至摩夷為欲界六欲俱淨則升色界人道眇眇微而陽失仙道莽莽高遠難明生門者生人生物之門成仙作佛之門鍾離真人曰生我之門死我戶即此門也為人悟則慾鬼當此之門為樂天道好生為貴而人苦趣鬼道高上清靈真高上之人心清性靈其辭真慨悲憫思感謠歌朗徹太空葛仙翁流珠歌曰

流珠流珠役我區區忙忙汲汲忘寢失哺吾今六十憂赴三塗真人度我要大丈夫

諱觀斯語豈非悲歌朗太空者乎太上留經之意願世人修證仙道不欲人趨邪道而終窮也北都泉曲府世之慾海中萬

鬼群總皆色類若人耽迷則過算而絕命根學人為阿人或居色界時歌洞章攝伏羅鄴蓋北都羅鄴乃人之慾根也慾根纒動羅鄴起漫漫之黑雲六鬼交鋒妖精趙淋淋之苦兩學人到此要降伏之變欲界

而為長樂以煉還丹化鬼妖而為諸天以施靈藥則金光之炁蕩蕩而我丹道日興隆矣頌曰伶俐惺惺日夜忙誰分地獄與天堂好將冷眼看浮世喚醒阿人歌洞章

第二色界魔王之章

落落高張明炁四塞梵行諸天周回十方无量大神皆由我身我有洞章萬編成仙仙道貴度鬼道相連天地渺莽穢炁氛三界樂兮過之長存身度我界體入自然此時樂兮薄由我恩龍漢蕩蕩何能別真我界難度故作洞文變化飛空以試爾身成敗懈退度者幾人笑爾不度故為歌音

自越行天至曇誓天共一十八天為色界此天之人有形无欲分極細輕一十八塵塵染俱淨升无色界落落高張色天遠大明炁四塞梵炁朗明无量大神我身魔試洞章萬編結習皆忘仙道貴度出于色界鬼道欲人相連色界丹陽真人東州富室日唯耽樂重陽祖師特往度之一見即曰我來扶醉人丹陽瞋曰如何是道曰五行

不到處丹陽大悟從學登仙此豈非仙道貴度者乎天地渺莽色境何窮南華經云物來无窮我心有際穢炁氛氣結而不散三界樂兮過之長存過此色界超三界天升上清境可以長存身度我界體入自然

色超色類不為所述得大自在薄由我恩因經悟道龍漢蕩蕩其偽莫分我界難度色相未除豈能度脫魔境故作洞章之文以相勉又變化飛空以魔試其間成者少敗懈退者多笑爾不能出此色境故為歌謠此文也頌曰色界天中十八塵此心未淨即非真要知我界何難度度者如今有幾人

第三无色界魔王歌曰

三界之上眇眇大羅上元色根雲層峨峨唯有无始浩劫之家部制我界統乘玄都有過我界身入玉虛我位上王匡御來魔空中萬變穢炁氛保真者少迷惑者多仙道難固鬼道易邪人道者心諒不由他仙道貴實人道貴華爾不樂仙道三界那得過其欲轉五

道我當復奈何

自皓庭至秀樂四天為无色界太真科曰
 无色界中至真无情色欲俱空无復形質
 之患修至一天唯存心識以入炁觀炁觀
 道成上升一天又能去除心識以至无為
 復升一天若萬法在心若有若无又升一
 天若炁觀轉妙結習都忘洞入自然即升
 種民天也本際經曰煩惱為結學業為習
 結習已盡超種民位洞入道境隨炁升降
 矣所不及也青元真人曰无色界中雖能
 離染忘色然未能遺忘尤以心識為患故
 有穢炁氛葩則鬼道易為邪入偶失制御
 即墜色界直須忘心自遣觀空入妙老君
 經曰所空既无无亦无湛然常寂方是
 真靜昔浪子劉長生真人洛陽三年日唯
 觀空遺忘愛根纔動便乃誦曰北都泉曲
 府中有萬鬼郡但欲過人筭斷絕人命門
 誦此誦章愛根斬然豈非阿人歌洞章以
 攝北羅鄴者乎此為真寶工夫所謂仙道
 貴實也世皆耽迷不樂仙道轉輪五苦須

欲提拔復奈何頃曰无色天中甚麼无
 這回心地莫糊塗他家不是開花草要把
 真身入五虛

此三界之上飛空之中魔王歌音音參洞章
 誦之百偏名度南宮誦之千徧魔王保迎萬
 徧道備飛升太空過度三界位登仙公有聞
 靈音魔王敬形勅制地祇侍衛送迎拔出地
 戶五苦八難七租昇遷永離鬼官魂度朱陵
 受煉更生是謂无量普度无窮有秘上天文
 諸天共所崇泄慢墮地獄禍及七租翁

三界之上无非魔王之所居飛空之中徧
 歌誦章以魔試能裨妙道故參洞章夫天
 尊說誦經曉世人以行道誦之百徧猶梵
 炁之初回是云名度南宮誦之千徧猶胎
 嬰之已結故云魔王保迎萬徧道備脫胎
 神化故云飛升太空此謂道備若不修道
 只誦萬徧以望飛升者亦難矣經功圓成
 過度三界還丹行滿位登仙公有聞靈音
 萬劫一過魔王敬形道高德重勅制地祇
 初乃梵炁地即戊土流戊就己返本還元

拔出地戶陰消陽長五苦八難超五行數
 除八識根永離鬼官陰絕坤戶魂度朱陵
 陽聚離宮有秘上天文凡學道之人觀經
 則寶愛而珍藏還丹則潛修而密煉是謂
 之秘諸天共所崇丹道與經皆圓諸天共
 所崇仰何謂泄慢輕易妄為有聞而不行
 或行而不秘皆受泄慢之禍恐墮地獄之
 中至於禍及租翁即是喪盡元炁却恣丹
 經妄語又謂太上空言寧不回思自己妄
 為泄慢之過也頃曰何故誦章參洞章只
 緣地獄與天堂儘知地獄惟心造好向天
 堂做一場

道言此二章並是諸天上帝及至靈魔王隱
 秘之書皆是大梵之言非世上常辭言无韻
 麗幽无華究故謂玄奧難可尋詳上天所寶
 秘於玄都紫微上官依玄科四萬劫一傳若
 有至人齋金寶質心依舊格告盟十天然後
 而付焉

上陽子曰此經冠于諸經者首尾相應前
 後相隨故也如上卷乃天真皇人筆錄玉

晨道君序述无始天尊之說而萬世之下
得此經誦之者猶如當時親觀其事斯為
妙也本章玉曆二章為正經三界魔王歌
章接于二章之後不屬正經以其文魔試
學人之功為多故參于元洞之末是云音
余洞章也此下則天真皇人又述道君之
言耳此二章即混洞赤文元洞玉曆二章
混洞赤文明先天无始玄一之還丹元洞
玉曆明後天无為至真之妙道言此二章
獨掌不鳴並是諸天上帝无非一陰一陽
至靈魔王全資神用隱秘之音玄關一竅
大梵之言鉛銀砂汞在經則為諸天帝魔
之隱秘在丹則為玄牝刀圭之梵言非世
上常辭世上愚人開口談道且不知道為
何物亦不知物為何用此謂非世上常辭
也言无韻麗信言不美曲无華宛華則不
實故謂玄奧頽閱雖慧莫精難可尋詳黃
老无師難悟上天所寶首經而已秘于天
宮非世常用四萬劫一傳非人不可授至
人者乃至聖之人也金寶質心以財易法

夫金與寶世之所重愚人以金寶為命勝
人以功名為命義士以名節為命至人以
道德為命故至人煉金液九還神丹乃假
金寶以為法財有法无財事鮮克濟有財
无法即同愚人經法流通法財兩用依格
告盟方可付強為妄作事難全此道用之
說也若論世法則未見以金寶為質信而
請經一卷者更四萬劫亦莫之有何以故
彼安知是經有長生久視之道焉若言道
用猶或有之何以故彼上根法器之士宿
命因緣於丹經內默有所得未能深達玄
旨忽聞此經妙諦必齋金寶信受不疑夫
九還七返之方必外藥而合內藥若非金
寶為質則安能得此經之妙又安能伏虎
以降龍又安能得先天之炁自虛无中來
也凡今之世愚夫濁子一聞法財必為大
笑便謂修行者要徹骨貧一絲不掛只從
事頑坐流于空寂濟蕩此輩直賺到老安
知齋金寶以求妙經是法財兩用之旨希
夷真人入室詩曰入室何獨異金花日日

開靈苗從地出香藥回天來又云欲慕天
中寶應須動世財蓬萊瑤洞裏醜就九還
括王鼎真人曰凡俗欲求天上事尋時須
用世間財蓋天中寶天上事是仙家密密
運用之機却非傍門採取之謬伐瑤迷伽
承師教已問云何為報師曰若辦五百獨
利沙鉢那者是表深心爾時迷伽遍地尋
覓既具集已即呈偈曰饒財多寶珍眷屬
具成就必定於菩提常安住於法夫伐瑤
迷伽為天人師留此一偈與後來人證道
作佛之眼目非同外道邪魔之行諦觀斯
語則此經必金寶質心而後付方得其妙
頌曰一些財利不關心金寶何為度得人
我是青城親付屬還丹只要虎龍親

元始无量度人上品妙經註解卷中